

摘藻堂四庫全書薈要

集部

欽定四庫全書薈要

集部

翰苑集卷六

四至

詳校官編修臣汪鏞



欽定四庫全書薈要卷二萬六百十

集部

翰苑集卷四

唐 陸贄 撰


制詔

優恤賜功臣
名改州府

賑恤諸道將吏百姓等詔

國之經制儲畜備災雖遇凶年人無菜色時或弛征散
利務穡勸分徙有以均無因豐而補敗救患之術抑其
次焉自戍役繁興兩河尤極農桑日廢井邑為墟丁壯

服其干戈疲羸委於溝壑傷夷未復荒饑荐臻厯河朔而至于太原自淮沂而被于洛汭蟲螟為害雨澤愆時稼穡卒痒烝黎重困然猶徵賦不息征役未寧凍餒流離寄命無所興言感悼焚灼于懷朕聞刑罰失中虐殄斯作致咎之本在予一人萬姓何辜遭罹其弊兢兢惕畏不敢遑安庶蠲下土之災用答上天之戒其宣武等軍宋亳陳州等節度淄青等州節度河陽懷州節度東都畿汝等州節度潞美軍澤磁邢等州節度保寧軍節

度成德軍恒深趙等州節度易定等州節度每管各賜米五萬碩所司即般運都於楚州分付各委本道差官受領賑給將士百姓等務令均洽以惠困窮屬軍費方殷國儲尚歉今所賜賑給其數非多猶慮孤惻或未周贍穀價翔貴何能自資江淮之間連歲豐稔迫於供賦頗亦傷農收其有餘濟彼不足允孚發斂之術且叶變通之規宜令度支於淮南浙江東西等道量置場加價和糴米三五十萬碩差官般運於諸道減價出糴貴從

權便以利於人無或勞煩重予不德方岳守將實朕股肱卹患分憂與朕同體宜即遣使分道宣慰勞勉將士省問鄉閭有可以救歲之凶災除人之疾苦各與本道節度使商議具以聞奏必精必詳用稱朕意

優恤畿內百姓并除十縣令詔

朕以薄德託於人上勵精思理期致雍熙鑒之不明事或乖當百度多闕四方靡寧傷夷未瘳而征役荐起流亡既甚而賦斂彌繁人怨聞上天災降下連歲蝗旱蕩

無農收惟茲近郊遭害尤甚豈非昊穹作沴深儆予衷
跼蹐憂慚罔知攸措今穀價騰踊人情震驚鄉閭不居
骨肉相棄流離殞斃所不忍聞公私之間廩食俱竭既
無賑恤猶復徵求財殫力疲繼以鞭箠弛征則軍莫之
贍厚斂則人何以堪念茲困窮痛切心骨思所以濟浩
無津涯補過實在於增修救患莫如於息費致咎之本
既由朕躬謝譴之誠當自朕始宜令尚食每日所進膳
各減一半宮人等每月惟供給糧米一千五百碩其餘

悉皆停省年食支酒料宜減五百碩飛龍廐馬從今已
後至四月三十日已前並減半料京兆府百姓應差科
徵配及和市和糴等諸色名目事無大小一切並停公
私債負容待蠶麥熟後徵收百司非至切之務如追擾
百姓及追勘徵收等色府縣並不須承受其尋常訴訟
非交相侵奪者亦不得為理百姓及諸色人等如能力
行仁義均減有無賙貸貧人全活數衆者府司具事跡
聞奏朕當授以官秩蠲其征徭如縣令勸導有方流庸

克濟至夏初已來類例勘會但戶口無減田疇不荒亦
以狀聞量加優獎百姓有迫於荒饉全家逐食者其田
宅家具樹木麥苗等縣司並明立簿書印記令所由及
近鄰人同檢校勿容輒有毀損及典賣填納差科本戶
却歸使令復業夫致理之本必在於親人親人之任莫
切於令長導王者之澤以被於下求庶人之瘼以聞于
朝得失之間所係甚大且一夫不獲辜實在予況百里
之安危萬人之性命付以長吏豈容易哉今旬內凋殘

亦已太甚每一興想盡然傷懷非慈惠不能卹疲氓非才術無以賑艱食臺郎御史選重當時得不分朕之憂救人之弊昨者詳延羣彥親訪嘉猷尚書司勳員外郎竇申等十人咸以器能理道精心究烝黎之疾苦知教化之宗源輟於周行往涖通邑申可長安縣令鄭珣瑜可檢校吏部員外郎兼奉先縣令韋武可檢校禮部員外郎兼昭應縣令賈全可咸陽縣令兼監察御史霍琮可華原縣令兼監察御史王倉可檢校禮部員外郎兼

昭應縣令李曾可蓋屋縣令兼監察御史荀曾可三原
縣令兼侍御史李緄可富平縣令兼殿中侍御史其有
散官封賜者並如故應畿內縣令俸料宜準常參官例
均融加給涇陽縣令韋滌潔已貞明處事通敏有禦災
之術有字物之方人不流亡事皆辦集惟是一邑之內
獨無愁怨之聲古之循良何以過此就加寵秩允叶前
規可檢校工部員外郎兼本官仍賜緋魚袋并賜衣一
襲絹百匹馬一匹嗚呼積行在躬雖微必著咨乃庶尹

其惟欽哉朕聞為君者必擇人而官為臣者罔擇官而處弛張繫於理不繫於時升降在乎人不在乎位朕方抑浮華以敦教稽言行以進人非次之恩以待能者彰善黜惡期於必行凡百君子各宜自勉

重優復興元府及洋鳳等州百姓詔

朕巡狩山南自春涉夏師旋殷會日費既廣州閭杼軸歲計其空東作妨時西戍罕望雖黽勉從事人不告勞而憫悼積衷予實知愧昨者減其租稅優以復除庶乎

有瘳汔用小息泊駕言旋軫躬履畏途絕礮縈迴危棧
綿亘時經霖雨道阻且修工徒造舟縣人葺路靡幼靡
耄莫獲寧居而又齎負糗糧供備頓舍涉于千里飫我
六師居人露處以罔依宿麥過時而不穫覩茲妨奪彌
增感傷前所復除未足酬卹式敷惠澤以紓大勞其興
元府除先優復外宜更給復二年鳳州全放今年稅其
興元府鳳州界內知頓及修道路閣橋州縣官將士等
並委嚴震類例功効具名聞奏量與甄獎嗟乎古先哲

王東征西怨顧予不德重以勞人補費錄勤是有申命
長吏明加優諭稱朕意焉

議減鹽價詔

三代立制山澤不禁天地材利與人共之王道寢微強
霸爭驚於是設祈望之守興權管之法以佐兵賦以寬
地征公私之間猶謂無澤歷代遵用遂為典常頃寇
難荐興已三十載服干櫓者農耕盡廢居里閭者杼軸
其空革車方殷軍食屢調人多轉徙田畝汙萊乃專煮

海之利以為贍國之術度其所入歲倍田租近者軍費
日增權價日重至有以穀一斗易鹽一升本末相踰科
條益峻念彼貧匱何能自滋五味失和百疾生害以茲
天斃實為痛傷嗚呼朕丕承列聖之緒遐覽前王之典
既不克靜事以息用又不獲弛禁以便人征利滋深疲
甿致困予則不恤其誰省憂應江淮并峽內權鹽宜令
中書門下及度支商議裁減估價兼釐革利害速具條
件聞奏削去苛刻止塞姦訛務於利人必稱朕意

賜京畿及同華等州百姓種子賑給貧人詔

春陽布和萬物暢茂實兆庶樂生之日農夫致力之時
今茲吾人則異於是迫以荒饉愁怨無憐有離去井疆
業於庸保有乞丐途路困於死亡鄉閭依然煙火斷絕
種餉既乏農耕不興若東作僊時西成何望為人父母
得不省憂雖國計猶虛公儲未贍濟人之急寧俟盈豐
罄其有無庶拯艱厄京兆府百姓並宜賜種子二萬碩
同華州各賜三千碩陝虢兩州賜四千碩委州長吏即

於度支計會請受差公清仁恤之吏與縣令親至村閭
隨便給付仍加勸課勿失農時應諸倉所有遠年粟麥
宜令節度更分二萬碩京兆尹即差官逐便般載賑賜
貧人先盡鰥寡孤惻目下不濟者務令均給全活流庸
嗚呼朕德之不敷誠之不感上帝降割丁寧厥躬元元
何辜罹此災害思欲拯救未知其方長人之官寄任斯
重所宜極慮與我同憂勉敷惠和以育疲瘵佇聞良術
稱朕意焉

賜將士名奉天定難功臣詔

國家受天明命平一字內自武德迄于天寶百四十載
海內無事崇德廣化澤浸生人時洽和平俗登富教鯨
寡孤獨咸得其所鳥獸魚鼈亦罔不寧凡今有生實賴
亭育羯虜伺間盜起幽燕率土之人莫保性命肅宗以
神武戡大難先朝以仁德紹興運區域再造億兆再康
室家離析而復安子孫煦嫗而相長勞來安集垂三十
年則我列聖之於天下惠澤深矣朕以寡昧祇膺寶歷

常恐不克負荷罔敢怠荒道有未明事多乖謬羣情壅而不達大信鬱而不彰兩河之間羣盜連禍朕務除大患靡憚暫勞是以興有征之師問干紀之罪昨以涇原士徒將赴汝郊失於撫綏致使潰叛朱泚乘釁因構異圖肆其狼心誘我蝨賊謂君可叛謂天可欺縱恣凌悖無所愧畏朕失守宮闕出次郊畿九廟震驚萬姓奔駭內省思咎外顧懷慙罪實在予不敢自蔽意者宗社降祐大猷于朕躬夙夜殷憂庶乎有補實賴股肱心膂勵

從戎之節方岳將校集勤王之師赴難如歸見危思奮
堅貞勵操何日忘之平巨猾者必仗羣雄賞茂績者不
限彛典保勲庸於帶礪傳爵邑於子孫崇功美名與國
終始其諸軍使應到奉天縣將士等宜並賜名奉天定
難功臣食實封者子孫相繼代代無絕身有過犯遞減
罪二等子孫有過犯遞減罪一等當戶應有差科徭役
一切蠲免其功臣已後雖衰老疾患不任軍旅者當分
糧賜等並與全給身死之後回給家口十年勿絕如有

能梟擒朱泚者即以朱泚在身官爵授之仍加實封二千戶朱泚所有田宅財物悉並充賜其梟擒賊大將已下并節級特加優寵仍各與實封應梟擒人所有田宅財物亦使賜之其餘立功應合授官給賞並準今年七月勅處分其今日已前身死王事者追贈官爵亦稱奉天定難功臣子孫為功臣之家應合襲封減罪蠲免差役等一切同例宣告中外令知朕懷建中四年十一月

二十三日

改梁州為興元府升洋州為望州詔

自昔多虞順時而動古公避狄兆永祚於岐下高帝徙
蜀建雄圖於漢中王蹟所興子孫是奉覩遷居於遐阻
知致君之艱難矧天下為家不常厥邑王者所至四方
會同崇號設都於是乎在朕遭罹寇難播越梁岷烝庶
煩於供億武徒勤於扞衛凡百執事各奉厥司人皆競
勸物以豐給嘉乃成績予懷不忘今大憝已除京邑甫
定將旋法駕展敬園陵眷于是邦復我興運宜其崇大

以示將來古者天子省方則問耆年卹百姓以頒慶賜以茂勲勞用弘布澤之恩式慰來蘇之望宜改梁州為興元府其署置官資望一切與京兆河南府同南鄭縣升為赤縣諸縣並升為畿縣見在州縣官各令終考秩至考滿日放選依本資處分耆壽與板授五品官仍並賜緋先已賜緋並賜紫典正等各賜勲五轉百姓除先減放稅錢外更給復一年洋州宜升為望州見任州官亦並令終考秩并諸縣官等各減兩選無選可減者各

加三階應山南西道節度下將士除扈從迎駕已經改
官者餘並即與甄敘嗚呼古先哲王東征西怨顧予不
德重于勤人撫心咎已良增愧歎宣示有衆明知朕懷

翰苑集卷四

欽定四庫全書薈要卷二萬六百十一

集部

翰苑集卷五

唐 陸贄 撰

制誥

慰勞招撫處分事

奉天遣使宣慰諸道詔

古者天子巡狩之義以考國典以觀人風在時多虞或所不暇乃命卿士使于四方問人疾苦庶吏善惡苟副所任則如親臨在理平之時尚資勤恤當喪亂之際得

無省憂朕以不敏肆于人上撫馭失道誠感未孚寇盜
繁興阻兵拒命哀哉臣庶陷于匪人顧茲田疇鞠為茂
草不念柔復遽命徂征徵發兵甲萬里必至暴露營壘
連年不息冒于鋒刃繼以死傷煢嫠無依父母廢食存
者積思家之怨歿者倍異鄉之痛又以軍費滋廣公儲
不充厚取於人罔率厥典科條互設誅斂無常農工廢
棄其生業商賈咨嗟於道路軍營日益閭井日空凋瘵
日窮徭役日甚以財力之有限供求取之無涯暴吏肆

威鞭笞督責嗷嗷黔首控告何依怨氣上騰咎徵斯應
疫癘荐至水旱相乘罪非朕躬誰任其責朕自嗣位迨
今六年連兵不解已踰四稔雖本非獲已義在濟人而
事乃重勞敢忘咎已皆以朕之寡昧居安忘危致寇之
由實在於此予則不德人亦何辜愧恨積中痛心疾首
昨者改元施令悔往布新將反側獲安則干戈日弭賦
役差減則衆庶就康還定流亡與之休息猶懼思慮未
周于庶務誠感未達于遐方一理失中一夫不獲則何

以謝天譴致人和俾代予言其在良弼宜令門下侍郎
同中書門下平章事蕭復充山南東西鄂岳荆南江西
淮南浙江東西嶺南福建等道宣慰安撫嗚呼往率乃
職敬敷朕命慰勉征戍勞徠困窮訪其所安察其所弊
淹滯必達冤濫必申無憚幽遠而不被無略細微而不
恤洎乎編氓比屋咸若朕之躬親股肱惟良予則有賴
其諸道將士並準今年正月一日制嚴備疆界勿使侵
擾仍各令本使本將速具名銜等聞奏悉與甄敘其殊

功勁節超越常倫別條狀績當特優獎百姓除每年兩稅
定額外自餘徵率一切並停課勸農桑各令安業寇難
既定漸息干戈朕當躬先簡約庶務節省兩稅之內亦
更減除其諸道事緣急切須處分者即與所在節度觀
察使商議裁度務合便宜其餘利害還日條奏朕當詳
省以擇厥中宣布遠邇咸使聞知

收復京師遣使宣慰將吏百姓詔

朕獲承先顧付以大器懼德不類貽列聖羞虔恭惕厲

罔敢暇逸將欲立法齊一致俗和平小信未孚衆心遂
阻事理乖當百度失中君臣之間鬱堙不達致寇雖深
於罪已興戎猶昧於省躬期靖亂以濟人反勞師而黷
武行者被殺傷之苦居者重齎送之勞四海騷然靡有
寧處京輦之下杼軸亦空環列之中遣戍殆盡略內以
勤遠居安而忘危賊臣誘姦乘間竊發豺狼穢于宮闕
士庶陷于塗炭作威肆戮仇視我人萬姓嗷嗷呼天罔
告有殞蹈以抗節有脅從以假命且一夫不獲辜實在

予朕君臨萬邦作人父母既不克覆育又從而咎之其
心愧耻一食三歎退舍內訟介于梁岷庶乎有瘳以荅
譴戒皇天悔禍宗社降靈腹心爪牙奮謀宣力元惡稔
慝脫身逃遁餘黨歸誠率衆款附埽氛沴而闔閭闔翦
鯨鯢以清郊原函夏載寧室家相慶非將士夾輔王室
非卿士交修予違軍旅叶心畢命盡敵豈伊寡昧克復
興運戡定大難載感予懷宜令吏部侍郎班宏充上都
宣慰使勞問將士撫綏烝黎招輯流亡慰安反側朕續

整飭法駕擇日還京告謝于祖宗請罪于天地策勲行
賞大報忠烈銘功永代與國同休明宣朕懷咸使知悉
平淮西後宴賞諸軍將士放歸本道詔

朕纂奉丕業託于人上仁不被物義不勝姦頌聲蔑聞
暴亂連起叛臣希烈竊據淮沂誠則彼夫無良亦由朕
之不德撫御之道失之於初師旅一興縣聯莫解服勞
者從役不暇受污者無路自新旱蝗相乘穀糴翔貴兵
氓餒死十室九空通邑化為丘墟遺骸遍于原野每念

於此傷心涕流且自昔勞師靡有不悔以虞舜之聖屈
於苗人漢武之強弊於戎虜矧乎德猶不逮力或未全
我其永懷求已自警乃者下哀痛之詔布寬大之恩普
天載新殊死必宥然尚勞師旅作扞邊陲有累歲棄離
家室有經時不解甲冑忠雖為國咎實在予君人若斯
寧不知愧賴節將士旅一其誠心奮發武威慎固疆宇
遠人思服元惡就誅烝黎方致於安寧役戍永期於休
息懋官以旌善錫宴以勞旋賞不踰時式遵彝典都統

檢校司空同中書門下平章事劉從一宜與子孫一人
五品正員官鄭滑節度使檢校尚書右僕射李澄檢校
兵部尚書曲環檢校戶部尚書李臯兼御史大夫樊澤
等並與子孫一人七品正員官都防禦使工部尚書御
史大夫賈耽都團練使檢校左散騎常侍兼御史大夫
盧元卿兼御史大夫張建封等並與子孫一人八品正
員官檢校司空同中書門下平章事李抱真檢校司空
同中書門下平章事李納檢校尚書右僕射同中書門

下平章事韓滉檢校工部尚書御史大夫田緒咸遣士
旅遠赴行營同討不庭厥有成績抱真納滉宜並與子
孫一人七品正員官緒與子孫一人八品正員官應與
淮西接界州縣本界鎮守及諸道赴行營將士等宜共
賜物三十萬端匹以充賞設度支即約據界首及行營
軍額分配定數逐便支送仍委本道都統節度防禦都
團練使即條錄功第名銜聞奏並與甄叙其行營將士
仍各放歸本道明加宣諭令悉朕懷

加王武俊李抱真官封并招諭朱滔詔

三公之職論道經邦序五行之和任百事之理歷代崇
重不常厥官天祚皇家茂生才傑比義齊列同寅協恭
以德允台階之望以勲當并賦之賜聿應並命式副具
瞻開府儀同三司檢校司空同中書門下平章事使持
節恒州諸軍事守恒州刺史充成德軍恒冀深趙等州
節度觀察處置等使琅邪郡王王武俊秉志沉密臨事
能斷忠而致力勇且有仁奮發之初渠魁即戮危疑之

際大節首彰開府儀同三司檢校尚書左僕射同中書
門下平章事潞州大都督府長史昭義軍澤潞磁邢等
州節度觀察處置度支營田等使上柱國符陽郡王李
抱真質重氣和內精外朗智窮變化守必以常學本明
誠動有攸利謀猷屢告規益孔多皆勗力盡瘁志匡王
室陳師鞠旅同討不庭仗大義而萬衆叶心體至公而
千里同契合軍於呼吸之際決策於指揮之間并轡載
馳執桴親鼓兇徒殄殪河右廓清國家無北顧之虞姦

慝阻南侵之計時乃同德厥功茂焉敷五教而阜人均
九土以居衆俾爾更踐備揚洪休乃加真實以貽後嗣
武俊可檢校司徒同中書門下平章事抱真可檢校司
空同中書門下平章事賜實封五百戶嗚呼古人有言
曰惟理亂在庶官矧惟輔臣與國同體明朕德命爾其
欽承朕嗣位不明輕費尚力謂武可以靖暴慢謂刑可
以懲姦邪德之不修亂是用長士馬疲耗烝庶流離罪
非朕躬誰任其咎自去歲遭變再經播遷厯山川之險

艱知軍旅之勞苦惟省前過悔恨盈懷追遠事而不及
庶後圖之可補以九廟為重而不憚屈身以百姓為心
而不專私欲苟可以保安社稷休息甲兵弘濟蒼生蠲
省徭賦含垢忍耻予無難焉朱滔受任薊門累著誠績
委遇既重封秩亦崇臣節中虧自貽伊阻洎賊泚僭竊
上京兄弟之親在法無赦朕以罪不相及情有可原待
以如初之誠廣其自新之路執迷不復固敗是求感喪
而歸既困方悟累獻款疏深陳懇誠省之惻然良用憫

歎雖將相嫉惡之志固所難容以君上懷柔之情未忍
拒絕且善莫大於改過德莫盛於好生叛而伐之服而
舍之銷難愛人實惟朕志宜委武俊抱真開示大信明
加曉諭若誠心益固善蹟克彰朕當掩疊錄勲與之昭
雪宣告衆庶咸使聞知

招諭淮西將吏詔

朕臨御已來連兵不息自經播越方厯險艱耳聞輦鼓
之聲目視殺傷之苦由是覺悟悔於興師既省己以知

非亦欲人之遷善至乃歲有再赦事有屢言務於撫綏
不憚煩冗冀朕之誠信日布冀人之患難日除每議用
兵惻然不忍而賊臣希烈煽禍滔天虐用其人仇視厥
衆狼心多忌梟性無親以芟伐立威以猜刻為志朝為
昵比夕為仇讎肆其芟夷蔑若草芥馮陵汝海流血盈
川侵軼浚郊積骸遍野農耕廢業井邑成墟積彼妖氛
發為災癘蕭條千里無復人煙朕哀彼生靈陷于塗炭
苟存拯物不難屈身故於首春特布新令赦其殊死待

以初誠使臣纔越於郊畿巨猾已聞於僭竊酷烈滋甚
吞噬無厭將相大臣咸懷憤激繼陳章疏固請除討朕
以所行天誅本去人害兵戈既接玉石難分言念忠良
遭罹脅制雖欲却陳臣節厥路無由受污終身銜冤沒
代淪胥以逞誠足痛傷宜令諸道節度使每欲進軍先
加曉諭今所致討唯止元兇其餘脅從一切不問如能
去逆効順因事建功明設科條以示褒勸其以一州降
者便授刺史封異姓王賜實封五百戶以一萬人已上

降者授刺史封國公賜實封三百戶其餘各據功效節級甄升列爵建官以俟能者朗然明信朕不食言宣示遠人各令知悉

招諭河中詔

朔方諸軍應在河中絳州朝邑將士等並以義烈繼代勲業冠時艱虞已來常濟國難肅宗代宗再復京邑皆是朔方將士之功去歲朕在奉天允黨攻逼解圍赴急亦賴此軍言念爪牙情均骨肉濟朕危厄感之豈忘頃

以懷光背恩自生猜阻熒惑將士汚脅忠良朕頻降詔書再三曉諭皆被懷光隱匿無亦志有加誣朕之誠懷竟未宣布夙夜自愧寢食不安時屬嚴凝屢頒衣賜豈以懷光一人拒命遂令將士俱不沾恩朕於功臣義存終始其朔方及諸軍應在河中絳州朝邑將士等今年春冬衣賜並準二月二十一日勅緣赴奉天解圍功臣等第給錢物宜令所司并許計料別收貯待道路通流即當時支遣其有歸順者續給其將士等有先賜實封

一切準元勅並州給牒委馬燧渾瑊逐分送付其差人
請受仍明加宣諭招撫務令忠義之士各悉朕意

安撫淮西歸順將士百姓勅

李希烈首亂淮瀆又侵滎汴充威所及罔不脅從百姓
既罹於網羅將士兼質其家口哀我衆庶銜冤莫伸雖
欲歸降何由自達朕為人父母不克保安遂使忠良橫
遭脅污興言憫悼思惻深衷今王師四臨所至尅捷將
士百姓款附甚多或棄其鄉園或捐其家族脫身効節

良有可嘉特宜撫綏以獎誠効應准西界內及鄭汴州等州將士歸順者委所在節度防禦等使便與收管切加存恤優給資糧仍各具名銜聞奏當與甄獎并給遣衣賜其百姓從賊界內歸順者亦委所在觀察使刺史量以本道諸色錢物賑給令得存濟如情願便住者即配與死戶田宅使營生業若欲赴諸州縣者隨其所之當時給文牒發遣不得止遏所至之處準前優賞率土之內莫非王臣雖陷寇中諒非獲已但能効順即是平

人務於招綏副朕所恤

甄獎陷賊守節官詔

沮勸二柄國之大綱獎善懲違固不可廢頃者賊臣構亂京邑震騷惟茲土人奔竄無所或從其誘脅遂染污名或守以純誠竟全貞節昨所司奏議但舉刑章坐累者各已條疏守節者並已甄異忠正而不報豈朕意焉應在京百司及京兆府長安萬年兩縣去年十月三日見在職事官在城陷於賊中潛藏不受逆命并諸色前

資官被偽署官爵頻遭迫脅首末不出事跡昭著衆所明知者並委御史臺訪察勘覈其事勿容虛濫仍限今月內具名銜事跡聞奏五品已上及常叅官已授替者委中書門下與處分六品已下各減三選不拘考例聽集其未得資被替非時放選仍稍優與處分如已喪亡者並與追贈使恩加存歿以稱朕懷

令百寮議大禮期日詔

朕自遷越旋於京師將欲請罪祖宗告謝天地所司擇

日行有期矣議者多以大盜之後人勞匪居懼愆歲功
請俟農隙若俯順羣議則私懷不安將祇率典章又疲
忙重擾夙夜憂惕罔知所裁宜令中書門下與常參官
即詳議折衷聞奏

不許諸軍侵擾勅

李希烈阻兵淮右虐害烝人朕哀憫無辜橫遭脅制若
興師行伐則玉石俱焚所以頻下詔書再三開諭曾無
悛革但益憑陵忠勇之徒皆思奮激朕悔於征伐務在

含容以一夫無良遂百姓罹禍安人忍耻初是素懷今東作方興麥秋在近儻行侵抄深害農功一方之人實足矜憫應與淮西接界州縣各委本道都統節度都防禦團練等使明申前勅嚴設隄防務使農人遂其耕穫賊若不先侵軼但自保守封疆勿令越境暴犯田苗及有侵掠務宣朝化以洽遠人仍於所在界首明加招諭咸令知悉

放淮西生口歸本貫勅

遷徙家鄉分離骨肉有生之酷莫甚於斯朕撫育兆人
庶臻理道懲過不可以不罰原情不可以不矜將推內
恕之心用廣自新之路應從李希烈作亂以來諸道所
有擒獲淮西生口配隸嶺南黔中等道宜一切釋放歸
本道其投降人等權於諸州縣安置者亦任各從所適
令諸道募靈武鎮守人詔

朕以寡德君臨兆人憂四鄙之不寧懼一物之失所降
心以懷戎狄期息征徭極慮以綏蒸黎冀遂安輯今諸

夏岳牧咸能撫封九姓可汗荐克敦好蒙羸之內其謂
小康愛人雖發於朕心濟理實由於藩輔豈惟菲薄所
致於茲然獨吐蕃負恩背盟棄約尚勞師旅備禦西陲
亦賴方岳同心簡練傑俊助其防鎮過彼奔衝數年以
來邊境寧謐乃眷靈武實惟雄藩扼東牧之咽喉控北
門之管鍵軍懸冠邇地遠勢孤雖無交切之虞須建久
安之策朕屬慮於此殆今累年晨思廢餐暮想忘寐征
兵益戍則憚其勞師移人實邊又念其離土朕欲令萬

姓各遂所安抑而使人情有不忍中懷結鬱罔知所從

古人有言主憂臣憤今朕憂矣將相牧守得不與我同
其慮哉此乃忠臣盡規之時勇士建功之日苟弘良算
必有其人宜令諸道節度觀察使各於本管諸色人中
募能赴靈武鎮守者取其情願重設賞科仍須精選驍
雄薄閑武藝便以本道諸色錢物給付仍優厚裝束發
赴上都每道各據所管州縣多少通計每州所募多不
得過五十人少不減三十人若欲將家口相隨便給資

糧同發遣如有戶貫在州者蠲免本戶差科其官健到日朕當超資與官至鎮便替朕之此意非務廣兵欲使四方驍雄俱到塞上壯邊城士旅之氣杜戎醜窺伺之心方岳信臣所當相悉勿令騷擾副我憂人

翰苑集卷五

欽定四庫全書薈要卷二萬六百十二

集部

翰苑集卷六

唐 陸贄 撰

制誥

冊命祝冊祭
大策問荅表

冊淑妃王氏為皇后文

維貞元二年歲次丙寅十一月丁亥十一日丁酉皇帝
若曰乾坤合德聖人則之惟帝承天惟后配帝嗣續百
代母臨萬邦位定于中而尊加于外德修諸已而化被

於人御於家邦所繫斯在三代崇替靡不由之予是以
詢衆採賢重難茲命中壺虛位於今厯年陰儀或虧宗
事無主缺於典禮朕甚愧焉稱是徽章聿歸全德咨爾
淑妃王氏天與純粹氣鍾元和含章在中發秀于外卓
爾風操穆然容輝周旋中規進退有度仁愛共儉稟于
生知詩書禮樂成自師氏竭其孝敬祇事先朝承事無
違克諧尊旨往居桂苑淑問已彰洎奉椒塗譙光載路
言無伐善志在匡瑕柔嘉自持喜愠莫見六宮攸序九

族以親嘗屬艱屯累從行幸思賢才以輔佐知臣下之
勤勞庶續伊凝頗資內助永念傾筐之志且懷求劍之
情崇位長秋永懷盛典矧惟元子貞我萬邦稽以舊章
是宜從貴今遣攝太尉某官某持節冊命爾為皇后嗚
呼敬哉王教之端始於內範風美闕雎之化雅詠思齊
之德罔懈厥位忝于前修克念有終庶無後悔奉承休
命可不慎歟

冊嘉誠公主文

維貞元元年歲次乙丑六月甲子朔十二日乙亥皇帝
若曰王者以義睦宗親以禮敦風俗義之深寔先於友
愛禮之重莫大於婚姻故春秋書築館之儀易象著歸
妹之吉予是用祇考令典率由舊章咨爾嘉誠公主孝
友柔謙外和內敏公宮稟訓四德備修疏邑啟封命為
公主徽章所被禮實宜之今遣光祿大夫檢校司徒同
平章事汧國公勉持節冊命爾惟欽哉下嫁諸侯諒惟
古制肅雍之德見美詩人和可以克家敬可以行已奉

若茲道永孚于休懋敷王風勿墜先訓光膺盛典可不
慎歟

冊蜀王妃文

維建中二年十一月某日皇帝若曰夫茂建親戚以敷
族固本明慎選納以厚別蕃嗣寔人倫之始王教之端
也朕奉若謨訓允求淑哲賢必有象鍾慶於令門姻不
失親載光於戚里故某官駙馬都尉田擇交第若干女
生稟柔惠習知禮則容德純備孝睦洽聞可以叶美好

述輔成樂善是用使某官某持節冊命為蜀王妃嗚呼
敬之哉備禮以崇其好合起家而居其爵位非義信不
固非溫順不親克恭匪懈則罔攸悔朕言必復可不慎
歟

冊杞王妃文

維建中二年十一月某日甲子皇帝使某官持節冊命
某官竇執第若干女為杞王妃曰於戲禮以大婚崇繼
嗣本人倫之教詩言淑女配君子繫王化之綱蓋率人

成風由內及外得不采嘉耦以固盤石刑閨門以御家
邦詳求惟難厯選茲久時乃之擇得于舊姻柔婉稟乎
天和禮樂成于家法明章婦順虔奉姆儀克茂鵲巢之
規叶宣麟趾之美其祇膺嘉禮欽率內教淑慎厥心無
替於後嗚呼可不慎歟

告謝昊天上帝冊文

維貞元元年歲次乙丑十一月癸巳朔十一日癸卯嗣
天子臣某敢昭告于昊天上帝顧惟寡昧不克明道丕

膺眷命俾作神主常恐獲戾上下而播災於人兢兢業業夙夜祇畏居位五祀德馨蔑聞皇靈不歆是用大儆殷憂播蕩踰歷三時誠懼烈祖之耿光墜而不耀側身思咎庶補將來上帝顧懷誘衷悔禍勦兇慝之凌暴雪人神之憤耻舊物不改神心載新茲乃九廟遺休兆人介福以臣之責其何解焉間屬寇虞久稽告謝今近郊甫定長至在辰謹以玉帛犧牲粢盛庶品冀憑禋燎式薦至誠太祖景皇帝配神作主尚饗

告謝玄宗廟文

維貞元元年歲次乙丑十一月癸巳朔十一日癸卯孝
曾孫嗣皇帝臣某敢昭告于皇曾祖考玄宗至道大聖
大明孝皇帝皇祖妣元獻皇后楊氏臣猥承聖緒獲主
大器懼德不嗣靡所安寧任重道悠竟貽顛越京闕生
變神人無依臣懷永圖不敢自棄忍耻含憤迨于載遷
戴天履地俯仰慙惕幸賴烈祖遺澤感深于人心攸
歸天意允若肆予小子憑宗廟之積慶再復于鎬京在

臣愆尤曷云有補豈敢自蔽以重于厥辜頃以寇孽在郊禮物未備久稽告謝伏積兢惶今祇見闕宮引慝請罪謹以一元大武柔毛剛鬣明粢薌其嘉蔬醴齊因時備物虔奉嚴禋尚饗

告謝肅宗廟文

維貞元元年歲次乙丑十一月癸巳朔十一日癸卯孝孫嗣皇帝臣某敢昭告于皇祖考肅宗文明武德大聖大宣皇帝皇祖妣章敬皇后吳氏臣嗣服先業不克負

荷人流於下事失其中奸魁乘豐作亂京邑播遷之咎
臣實自貽震驚宗祧曠時乏祀外憂內愧若墜深泉勵
已誓心期刷大耻實賴聖祖中興之業全育兆人澤深
慶遠流福裔嗣故上天悔禍羣孽就誅非臣寡昧所能
續服今祇率百辟見于廟廷謹以一元大武柔毛剛鬣
明粢薌苾嘉薦嘉蔬醴齊備物潔誠聿申告謝尚饗

告謝代宗廟文

維貞元元年歲次乙丑十一月癸巳朔十一日癸卯孝

子嗣皇帝臣敢昭告于皇考代宗睿文孝皇帝伏惟元
德廣運重光盛業武平多難仁育羣生謂臣克堪付以
大寶臣自底不類再罹播遷宗祧乏享億兆靡依下辜
人心上負先顧敢愛隕越苟全眇身大懼社稷阽危以
增九廟之愧由是忍恥誓志庶補前羞列聖在天鑒臣精懇
敷錫丕祐俾之纘承允渠殄夷都邑如舊茲臣獲執犧牲珪
幣載見于廟廷感慕慚惶若罔攸厝謹以一元大武柔毛剛
鬣明粢薌其嘉蔬醴齊陳誠待罪式奉嚴禋尚饗

祭大禹廟文

維貞元元年某月某日皇帝遣某官以牢醴之奠敬祭
于大禹之靈惟王德配乾坤智侔造化拯萬類於昏墊
分九州於洪波經啓之功于今是賴巍巍蕩蕩無得而
名顧以眇身辱承大寶時則異于今古道寧間于幽明
雖依聖垂休諒非可繼而勤人勵已竊有所希迨茲八
年理道猶昧沴氣鬱結降為凶災邦無宿儲野有餓殍
上愧明哲下慚生靈夙夜憂惕如蹈泉谷所資漕運用

拯困窮底柱之間河流迅激舟楫所歷罕能獲全爰命
工徒鑿山開道避險從易涉安代危嗷嗷烝人俟此求
濟仰祈幽贊以集丕功享于克誠庶荅精意

策問賢良方正能直言極諫科

皇帝若曰蓋聞上古至道之君垂拱無為以臨海內不
理而人化不勞而事成星辰軌道風雨時若邈乎其不
可繼何施而臻此歟三代以來制作滋廣異文質之變
明利害之鄉威之以刑道之以禮敷其俗而彌薄防其

人而益媮豈澆淳必繫于時耶何聖賢間生而莫之振也朕祇膺累聖之業猥居兆人之上乾居克勵如恐失墜憂濟庶務夕惕晨興永惟前王之典謨是憲是則師大禹以崇儉法高宗以求賢興夏啓之征作周文之罰旌孝悌舉直言養高年敦本業平均徭稅黜陟幽明勵精孜孜勤亦至矣然而浮靡不革理化不行暴亂不懲姦犯不息五教猶鬱七臣未臻鄉黨廢尚齒之儀烝黎無安居之志賦入日減而私室愈貧庶察日增而吏道

愈濫意者朕不明歟何古今之事同而得失之効異也
思欲剗革前弊創立新規施之於事而易從考之於文
而有據備陳本末將舉而行無或憚煩略於條對自頃
陰陽舛候祲沴頻興仍歲旱蝗稼穡不稔上天作孽必
有由然屢推凶災其咎安在傳曰時之不乂厥罰常暘
又曰堯湯水旱數之常也二者乖反其誰云從今人靡
蓋藏國無廩積朕屢延卿士詢訪謀猷至乃減冗食之
徒罷不急之務既聞嘉話亦已遵行而停廢之餘所費

猶廣俟轉糧於江徼則遠不及期將搜粟於關中則撓而無獲節軍食則功臣懷怨省吏員則多士靡歸中心浩然罔知攸濟子大夫蘊畜才器通明今古副我虛求森然就列匡朕之寡昧拯時之艱災畢志直言無有所隱

策問博通墳典達於教化科

皇帝若曰朕承祖宗之鴻烈獲主神器任大守重懼不克堪思與賢士大夫共康理道虛襟以佇側席以求而

羣議紛然所見異指或牽古義而不變或趨時會而不經依違以來七年于茲矣國制多缺朕甚惡焉今子大夫博習墳典深明教化褻然充舉咸造于庭其極思精心以喻朕之未寤仲尼敘禮樂刪詩書修春秋廣易道六經之教所尚各殊豈學者修行理當區別將聖人立意本異宗源施之於時孰為先後考之於道何者淺深差次等倫指明其義夫知本乃能通於變學古所以行於今今之教人則異於是工祝陳禮樂之器而不知其

情生徒誦禮樂之文而不試以事欲人無惑其可得耶
將革前非固有良術堯舜率天下以義比屋可封桀紂
率天下以暴比屋可戮然則上之化下罔或不從而三
仁四凶較然自異有教無類豈虛言哉作樂移風聞諸
昔典夫至雅必淡至音希聲文侯列國之賢君猶曰則
惟恐寐矧彼流俗其能化乎將使天地同和災沴不作
黎人不變姦慝不萌何施何為以致於此王者制理必
因其時故忠敬質文更變迭救三代之際罔不由之自

秦刻古法漢雜霸道紛綸千祀王教不興國家接周隋
之餘俗未淳一處都邑者利巧而無耻服田畝者朴野
而近愚尚文則彌長其澆風復質又莫救其鄙俗立教
之本將安所從自昔哲王惟以三正互用後之術士乃
言五運相生以漢應火行則周為木德禮稱尚赤義例
頗乖永言於茲莫識厥理九流得失之論歷代興亡之
由王鄭識理之異同公穀傳經之優劣必究用沃
虛懷

策問識洞韜略堪任將帥科

皇帝若曰朕遐觀典謨詳求理道三代之際粲然可徵
未嘗不文武並興農戰兼務故能居則足食動則足兵
兵足則威食足則固威則暴亂息固則教化行理國之
本實在於此秦漢已降王制不修選士廢射御之儀教
人無蒐狩之禮即戎者不知其稼穡力本者罕習于干
戈於是異文武之人分農戰之道守則乏食征則鮮兵
歷茲千年竟莫能復抑知者蓋寡將行之惟艱歟朕念

之甚勤思繼前躅良以軍旅之士役戍靡寧勲庸既多
爵秩咸貴俾服田畝慮興怨咨仰給縣官不可勝計由
是版圖日減阡陌歲荒水旱小愆廩餉咸竭欲使軍人
悅歸於耜耒儒者兼達於韜鈴田萊盡耕攻取必勝誘
人孔易其術安施王者之師本於立德兵家之法方務
出奇德以信成奇以詐勝理有違反將何適從宋襄成
列而敗軍見嘉魯策韓信決囊以摧敵取貴漢朝然則
喪國亡身豈霸王之道冒危乘厄非仁誼之心所宜討

論以定褒貶夫衆寡不敵克必以謀樂生下齊孫子破
楚魏武之勝袁紹宋高之滅姚泓成敗之由備陳本末
古人有言曰誅伐不可偃於天下又曰善為國者不師
二端異焉其有深旨子房序次兵法任宏論譔軍書指
明異同詳錄名氏想聞商略擇善而行

荅宰臣請停大禮表

朕失德致寇再經播越郊廟乏主禋祀曠時感憤積中
憂愧形外日月以冀庶補前修賴天地降休祖宗儲慶

再新景命祗復皇都自秋涉冬已遷於律候因心致享
未展於孝思而公卿上言邀予以備物都鄙興誦諷予
以勞人禮將俟於他年卜不先於近日永懷感慕情實
未安雖則嘉話重違其如至誠難抑所宜參會羣彥更
擇近期無或因循以增不德

荅百寮請停大禮表

朕再經播遷久曠禋祀不惟霜露之感實貽墜失之憂
賴先澤在人上帝臨我克平大難再復舊京朕之失德

非曰能補旋欲請罪宗廟展敬郊丘迫以羣情俟于獻
歲今滌牲撰吉甫及近期齋心永懷明發不寐忽覽來
表良深矍然雖嘉備慮之誠實乖昭事之意朕志先定
期於必行即斷來表也

荅百寮請停大禮第二表

國之大事首在祀典所宜嚴奉以達至誠況今之所懷
又異常日不克嗣守馴致寇戎淪陷國都震驚園寢幸
憑元祐再續鴻休播越三時久虧禋祀之禮旋歸半歲

未申告謝之誠感愧積中若墜泉谷坐而待曙跂及上
春庶乎天地靈祇以歆精意胡乃股肱卿士尚執疑謀
出既不及告辭入又廢於朝獻罔極之慕何心自安宜
潔乃誠以祇所奉副予懇切勿復頻煩

荅百寮請停大禮第三表

三省來表深體乃誠明孝敬之大端陳安危之上計祇
率嘉話夫豈不懷永言思之固亦難抑進退慙惕罔知
所裁中宵求衣當饋忘食且聿修祀事所貴專精苟未

至誠則如勿祭今近期甫及當齊潔敬之心而興誦紛然猶執異同之論禮既虧于嚴奉事奚展於孝思以義制心勉依來請重予不德愧歎良深

荅百寮賀利州連理木表

珍木呈祥允符靈貺顧惟不德何以當之朕聞人事聿修天休乃荅今則兇渠尚在戎役方殷虐旱妨農飛蝗害稼諒咎徵之未弭曷嘉瑞而復臻所冀公卿大夫交匡不逮覩茲稱述益用懷慙


荅宰臣請復御膳表

嘗覽典謨每嘉儉德愛人惜費是朕素懷況大兵之餘
繼以荒饉軍儲國計資用皆空洞戶疲眊膏澤已竭致
人於此過實在予內懷憂慚躬自損貶今允渠殘滅粟
麥豐成皆祖宗垂休非寡薄所致矧乎邦畿之內餒殍
尤多役戍之徒傷夷未復孜孜訓戒克已增修猶懼辱
守寶圖罔荅元祐豈宜暇逸以厚厥躬卿等誠在致君
將順其美顧惟虛缺非所宜然

荅百寮請復御膳表

頃者大勞不息至化未孚雨澤愆期蟲蝗為害朕以銷
災謝譴莫大於修誠節用愛人必先於克己顧慚愆咎
躬貶膳羞下以均衆庶之憂上以荅昊穹之儆至誠或
感嘉應遂臻宿麥方成元兇已殄慶深德薄惕厲彌加
忽覽表章過為稱述雖將順其美則曰乃誠而戒慎不
忘諒惟朕志未喻來請深體此懷

翰苑集卷六



總校官庶吉士臣侍朝

校對官中書臣張塤

膳錄監生臣鄧肇槐

欽定四庫全書薈要

集部

翰苑集卷

七至
十一

詳校官編修臣汪鏞



欽定四庫全書薈要卷二萬六百十三

集部

翰苑集卷七

唐 陸贄 撰

制誥 除授

李晟司徒兼中書令制

雲雷構屯寓縣興難非山岳降神不生良弼非股肱叶
契不集大勲故高宗得傳說中興殷邦宣王任吉甫重
光周道天寶之季寇陷二京時則先臣子儀翼戴肅宗

戡定禍亂再造區夏于今賴之肆予小子獲纘丕構不
克負荷失守宗祧天祚我唐降生忠烈有社稷之臣曰
開府儀同三司檢校中書左僕射中書門下平章事充
神策軍節度鄜坊等州管內觀察處置等使京畿渭南
渭北商華等州兵馬副元帥上柱國合川郡王李晟沉
肅有勇堅明能斷聞難感憤誓軍徂征誠激于衷義形
于色自河之右萬里濟師殷然雷奔大盜懾駭屬皇家
不造戎師誘姦重茲播遷郊甸震蕩而戢蓄銳養士深

壘固軍以謀吞元兇以義糾羣帥躬擐甲胄率先啓行
布忠信為軍聲持義烈為戰器廓清氛沴寧復皇都宗
廟載安宇宙斯泰佐予興運時乃茂功德厚者任崇業
盛者報重升以元輔建于上公熙庶績而翼宣九歌擾
兆人而敬敷五教用疇井賦貽厥子孫與國咸休永播
丕烈可司徒兼中書令仍賜實封一千戶餘並如故俟
還京後所司擇日備禮冊拜宣示中外以彰元勲

蕭復劉從一姜公輔平章事制

宰輔之任獻替為務內凝庶績外撫四夷調陰陽以成
歲功贊化育而熙帝載若金用礪其弼予違如旱為霖
允從人望矧時屬多難彌切任賢朕未嘗不朝夕論思
夢寐懷想道之所在人遠乎哉朝議大夫守戶部尚書
兼御史大夫充荆襄江西等道都元帥統軍長史豐縣
開國公賜紫金魚袋蕭復性質端亮理識精敏約已弘
物體方用圓為邦必表其理能及雷亟聞於鯁議動可
成範立不易方守尚書吏部郎中兼御史中丞充荆襄

江西等道都元帥判官賜緋魚袋劉從一貞白其行溫
恭其文居簡而適用必通體和而臨事有立持重能斷
端慤有恒累更委任多所弘益守京兆府戶曹參軍翰
林學士賜緋魚袋姜公輔志懷濟物監必通理主文而
諫忠靡退言經始以謀事皆前定道無屈撓智適變通
並可以參贊大猷光膺僉屬兵戎未靖期爾經綸都邑
未康期爾還定予一人有過爾是用乂欽哉慎乃有位
罔鰥厥官復可守吏部尚書同中書門下平章事散官

封賜如故從一可守尚書刑部侍郎同中書門下平章
事賜紫金魚袋公輔可守諫議大夫同中書門下平章
事賜紫金魚袋

張延賞中書侍郎平章事制

兩漢致理由乎審官多以牧宰高第入居台輔黃霸自
潁川而次遷丞相卓茂由密令而超拜三公蓋以為國
本於親人舉賢先於稱職旌能勸善風化大端今革車
荐興賦煩人散匡弼寡昧屬于才臣光祿大夫檢校吏

部尚書兼成都尹御史大夫充劔南西川副大使管内
度支營田觀察處置等使上柱國魏國公張延賞崇飭

文行勵精理道踐歷中外所至有聲慮必周密心無屈
撓簡廉以肅吏慈惠以愛人明以照姦和以定衆去若
始至久而見思秉志不渝課績常最以爾循良之化佐
予綏兆人以爾經綸之才佐予熙庶績仍資威重兼領
蕃維式慰甘棠之思且繼緇衣之美懋昭邦典勿替家
聲可中書侍郎平章事依前兼成都尹餘如故

渾瑊侍中制

論道經邦興戎定亂執是二柄毗予一人得諸全才康
濟大難懋官胙土備舉彞章開府儀同三司檢校尚書
左僕射同中書門下平章事兼靈州大都督府長史充
靈鹽銀夏等節度管內觀察處置度支營田押蕃部落
等使仍充朔方邠寧振武等道奉天永平軍行營節度
副元帥柱國樓煩郡王渾瑊神降才傑天資忠厚叶于
興運為國輔臣往以盜起上京駕言出狩羣兇怙亂再

犯郊畿時乃奮揚武威董制師律深居籌畫奸慝寢謀
當敵指揮士旅增氣危城克固我伐用張重以賊臣蔑
恩養寇資亂再罹艱阻播越巴梁時乃并轡載馳執羈
從邁有見危致命之節有憂國滅私之誠凜然貞規介
若金石縱橫有夷難之略感激陳復國之謀分總偏師
徑出重險秉大節以誓羣帥布寬令以宥脅從師次近
郊摧兇靡抗軍臨近甸下邑如歸推成功以不居期盡
敵以自効率其全衆揚旆前追雄威疾馳元惡授首柔

德懷服餘黨歸心埽闢氛昏安復園寢懋乃嘉績其維
格天范變之讓能耿弇之殄寇總是二美城其有焉足
以銘勲旂常垂美竹帛宜首台階之列仍疇井邑之賦
祇膺時命無替厥庸可侍中仍賜實封八百戶餘如故
盧翰劉從一門下中書侍郎平章事制

寅亮天工弘宣理本俾予從乂時乃輔臣扈蹕載驅以
勞定國懋官遷列式是彝章銀青光祿大夫行尚書兵
部侍郎同中書門下平章事范陽縣開國公盧翰嚴重

不撓貞方自持養恬鎮俗居簡濟衆言思無隱事必有
恒守刑部侍郎同中書門下平章事賜紫金魚袋劉從
一質厚氣深識精體遠冲用無竭貞規不渝從容以和
出納惟允自鸞車載駕薄狩于梁執羈有從我之勤及
雷勵匪躬之節交修不逮庶績其凝俾承命於掖垣仍
參掌於樞務今百度伊始六府載張論駁是非不可以
不審宣揚憲令不可以不明爾其欽承無墜我休命翰
可門下侍郎同中書門下平章事散官勲封如故從一

可中書侍郎同中書門下平章事餘如故

劉滋崔造齊映平章事制

朕嗣位君臨精求理道小大之務靡不經心目慎一日
于今八載教化未洽烝黎未康因之以甲兵繼之以災
沴斯固鑒有所不至慮有所不周予深浩然若涉深水
思所以匡我致理助我官人宣其澤而四方以寧執其
要而百工式敘允是大任其惟輔臣夢想勞懷敷求俊
乂察言而觀行因事以考能周行之中乃得良弼權知

吏部侍郎劉滋操履貞清介然自守居能慎獨動不違
仁析理究其精微勵學探於奧旨守給事中賜緋魚袋
崔造性合道要誠通化源適時有成務之才事上懷匪
躬之節蘊蓄器業居為名臣中書舍人賜紫金魚袋齊
映修己以立自明而誠體賢人可大之規用君子時中
之道虛受能擇清通不流惟滋之直方可以激風俗惟
造之體度可以振條綱惟映之精深可以該物理我有
大典爾其參之懋昭厥猷勿替休聞滋可充散騎常侍

同平章事造仍賜金魚袋其有散官封賜並如故

李納檢校右僕射平章事制

忠所貴乎竭誠善莫大於改過況茂勲有舊崇德日新
翼戴勵勤王之節經綸申盡敵之略敦獎之道時惟國
章平盧淄青節度管內度支營田處置等使開府儀同
三司檢校工部尚書使持節鄆州諸軍事兼鄆州刺史
隴西郡王李納稟性端厚執心寬簡通變適用和順積
中服勞王家夙有成績乘秋備塞克著威聲累歲專城

載揚理行間者心懷險阻誠義鬱堙旋能歸款上聞期
於率德自効忠節純固久而益彰爰整銳師式遏亂略
保障宋服填壓浚郊嶷如長城作固東土嘉乃率服之
美懋乃輸力之勤擢升袞司載董戎翰元成嗣台輔之
業亞夫繼社稷之勲俾爾兼榮無替厥服檢校右僕射
平章事餘如故

韓滉檢校左僕射平章事制

周召由輔弼之臣兼方伯之任蓋以理化根本在於親

人通兆庶之情以佐天子秉家邦之慶以臨諸侯故能
中外允釐上下無壅今我有命意其在茲金紫光祿大
夫檢校尚書左僕射兼潤州刺史御史大夫充鎮海軍
浙江東西節度觀察處置等使上柱國南陽郡開國公
韓滉文行忠信備修身之道勤儉貞固有成務之才累
更委過多處繁重一心奉職終始不渝內告謀猷以匡
時化外持憲法以一人心理尚廉平事皆釐飭奸盜衰
息禮義興行惠茲一方時乃之德陳師旅以遏寇讎納

餽糧以修職貢張我威武實我資儲今必應期謀無愆
素濟于多難時乃之功宜其參務中樞翼宣大化仍兼
漕運兼領蕃維樹南國之風猷贍中都之廩實予則
有望爾其懋哉繼於前人毋替厥服可檢校左僕射
同平章事依前鎮海軍浙江東西節度觀察處置等
使兼充江淮轉運使餘如故

李勉太子太師制

立國之本所繫於元良弘教之方必由於端士非精識

前典德冠當時恭敬溫文其將安倣吾是以輟台階之
老選宗室之賢輔翼春闈是資教諭檢校司徒同平章
事充太清宮使崇文館大學士上柱國汧國公李勉忠
信孝友直方簡儉達君臣父子之際知禮樂教化之端
虛澹保和貞明寡欲求舊則德懋敘親則屬尊師範國
儲無易其選可檢校司徒兼太子太師散官封勲如故
姜公輔左庶子制

君之任臣有優賢賜告之義臣之事君有量力知止之

道故能進退以禮終始可勝此朕三事大夫濟理圖全
之意也守諫議大夫同平章事賜紫金魚袋姜公輔首
舉高第擢居諫曹爰資美才參掌密命居易勵修身之
操見危著從我之勤自處台司累疏陳乞忌滿思退持
盈守謙畱中久之重難其請式光撫抑俾尹宮坊可太
子左庶子勲賜如故

崔造右庶子制

宰相之職允釐百工時惟仰成不可廢闕中散大夫行

給事中同平章事上柱國安平縣開國男賜紫金魚袋
崔造頃居掖垣參掌樞密總領繁重積勞疹深亦既優
賢賜之長告歲聿云暮有加無瘳披誠自陳章疏三上
知止之道守之甚堅處以休閑俾遂頤養可太子右庶
子勲賜如故

盧翰太子賓客制

求賢審官以康庶績就閑優秩以處舊臣蓋欲敦終始
之恩全進退之禮金紫光祿大夫行門下平章事范陽

郡公盧翰頃因多難從我于征以其年及老成任推先進方將求舊擢處台衡荏苒迄今亟淹星歲勤勞既久衰疾有加宜徙職於春闈用優賢于暮齒可太子賓客勲賜如故

翰苑集卷七

欽定四庫全書薈要卷二萬六百十四

集部

翰苑集卷八

唐 陸贄 撰

制誥 除授

賈耽東都留守制

河洛舊都時巡久曠命以居守俾之保綏間者淮甸不寧汝墳屢警增置軍府作藩王畿職任既分威望非重思有總制一其典刑爰資信臣往又東夏銀青光祿大

夫守工部尚書魏國公賈耽豁達貞方識通大體明九
域山川之要究五方風俗之宜恒因物情以施教化所
莅之郡霑其休聲悅李廣之風人皆自便懷羊祜之德
敵不敢侵自誠而明在久彌著分我憂寄實惟其人董
制軍師安集疲瘵統禦都邑提持紀綱懋昭厥猷無替
朕命可守本官兼御史大夫充東都留守東都畿汝州
都防禦觀察等使判東都尚書省事散官勲封如故

崔縱東都留守制

居守之重固難其人近歲以來益又繁綜領廉察之任
專禦備之權地廣務殷一皆咨稟非利用罔以通濟非
純德不能保綏周爰咨詢公論有屬銀青光祿大夫行
尚書吏部侍郎上柱國安平縣公崔縱素風自遠代濟
忠貞慶之所鍾繼有才哲氣質淳茂識度淹通蘊經遠
之沈謀宣適時之利用寬而不弛簡則能周以茲公方
多厯要重小大之務必聞休聲輟於周行式是東夏擢
居春官之長且兼副相之雄懋昭厥庸期復先構可檢

校禮部尚書兼御史大夫充東都留守判東都尚書省
充東都畿汝唐鄧等州都防禦觀察處置使散官勲封
如故

普王荆襄江西等道兵馬都元帥制

君人立極所務於勝殘秉律成師寔先於謀帥申明號
令總持紀綱弘九合之功決百勝之畧非慎柬不可以
濟事非僉屬不可以臨人集大勲者必舉於宏綱體至
公者無避於內舉爰擇蕃翰俾掌元戎開府儀同三司

舒王謨性稟忠厚訓知禮樂居常樂善動不違仁察其
內恕外溫必能安人和衆體方識敏諒可成功庶乎知
子之明授以貞師之律可揚州大都督持節充荆襄江
西沔鄂等道節度使及諸軍行營兵馬都元帥餘如故
仍賜名誼改封普王嗚呼小子誼其敬聽朕命我國家
之有天下百七十載于茲矣祖宗垂化紹統功德繼茂
威加殊俗惠洽普天海隅蒼生代受亭育躋之於福壽
煦之以仁和源廣流長慶深祚遠歷數有嗣續于朕躬

兢兢業業懼不負荷虔恭寅畏歲五周星循列聖之耿
光稽上古之謨訓一物失所是用疚心萬方有罪每懷
咎己懸法皆考於天則舉事必酌於人謀期合大中罔
循私欲而涉道猶淺燭理未明文闕於化成武乏於定
亂刑賞失中授任乖方厚澤未均大信未著致使兇慝
熾禍干紀亂常悖違君親蔑棄天地盜據我都邑痛毒
我士庶驅脅丁壯暴骸於原野攘奪羸老轉死於溝壑
忠良隕命義烈銜冤迫以兇殘莫由自奮憤深骨髓怨

結蒼旻朕所以中宵屢興終食三嘆哀蒼生之無告閔
赤子之非辜為人父母寧忘愧悼賴三事大夫竭誠於
內羣帥爪牙宣力於外交修不逮日冀康寧江漢上游
建瓴制寇亘千里之地連十萬之師保大定功宜有統
壹允副茲選往哉汝諧無以貴驕人無以善自伐無縱
已之慾無拂衆之謨從諫如流改過勿吝卑躬降志以
奉賓傳絕甘分少以撫軍師布誠信以歸人心明賞罰
以盡士力詰姦誅暴懋昭乃勲敬事恤人無替朕命膺

茲重任可不勉歟建中四年九月二十六日

馬燧渾瑊副元帥招討河中制

天地殊位君臣異制苟不率道茲謂亂常退而增修於是
有舞干之義諭以遷善於是有文告之辭若猶不悛
乃用致討興戎動衆豈得已哉李懷光擢自軍候委之
節制亟有勤績累加寵榮總衆駿奔自遠赴難解圍逐
寇朕甚德之位極上台寄崇總帥親之若同體信之無
間言朕於斯人亦已厚矣而器小任重固貽顛覆有功

自棄無罪自疑宗信讒邪脅逐將帥養寇資亂蓄奸幸災
朕素所推誠猶謂非實優容任遇坦然如初凶跡既盈
醜踪彌露謀危社稷通結渠魁公相往來無復忌畏窮
極兇悖所不忍言朕播遷巴梁遠遼陵寢大懼失墜為
列聖羞賴先澤在人北庶知感朔方將士忠節不渝懷光
既沮姦謀詭稱効順累陳款疏請詣闕庭朕深惟舊勲
務欲全貸授以師保之任疇其并賦之食璽書勞問誓
以終始懷光遂殺辱使臣完聚守保將以悖慢之罪加

於忠義之軍因茲脅從冀與同惡謂衆可罔謂天可欺
覆載所不容人臣所共棄討除大憝招輯非辜爰咨輔
臣以董戎寄銀青光祿大夫檢校司空同中書門下平
章事兼太原尹北都留守充河東保寧軍節度使北平
郡王馬燧操業端亮器宇宏達秉難奪之節負不羈之
才常持至公深識大體感激而三軍有勇彌綸而庶績
允諧威聲所臨郡邑皆復殿于北土隱若長城奉天定
難功臣開府儀同三司行侍中兼靈州大都督靈鹽豐

夏等州節度使管內度支營田觀察處置押蕃部落等
使充朔方邠寧振武等道奉天永平等軍行營節度兵
馬副元帥上柱國樓煩郡王渾瑊淳粹積中仁厚成性
布寬大以容衆著誠信以撫人事必沈詳臨危益辨節
惟貞固在險逾彰弘濟艱難懋昭勲闕出納朕命光膺
具瞻並文武全材安危注意副我憂屬時惟二臣比德
協謀往清多難燧可兼充奉誠軍及晉隰磁等州節度
管內諸軍行營兵馬副元帥餘並如故瑊可兼河中尹

充河中絳州觀察處置等節度使仍充河中絳州同陝
號等管內諸軍行營兵馬副元帥功臣散官勲封如故
嗚呼朕不敏不明失於君道連禍未息勞師靡居中心
自咎鬱若焚灼又以朔土之衆代著忠勞橫遭污脅深
所憫惜爾其敬敷朕命明諭朕懷務於招綏非黷威武
惟輸誠歸順固有不赦惟執逆拒命罰止元兇寧失不
經無濫無罪列爵懸賞用俟勲賢布告遠邇咸令知悉

李晟鳳翔隴西節度兼涇原副元帥制

周之元老以分陝為重漢之丞相以憂邊見稱故方岳
克寧疆場不聳安人保大致理之端今所以重煩上台
作鎮西土奉天定難功臣司徒兼中書令充神策軍節
度鄜坊丹延等州觀察處置等使仍充京畿渭北鄜州
華州兵馬副元帥上柱國合川郡王李晟勵精剛之操
體博大之德適時通變而大節不奪虛受廣納而獨斷
自明奉法以身推功以下衆無犯命人用樂從懷德畏
威令行禁止誓羣帥於危疑之際駐孤軍於版蕩之中

氣陵風雲誠動天地一鼓而兇徒懾北再駕而都邑廓
清師皆如歸人不知戰再安社稷功格皇天而明識秉
彝清風激俗雅尚恬曠撫謙有光朕以沂隴近郊扶風
右地川阜連亘抵於回中限界諸夷蕃屏王室所屬誠
重付之元臣兼二將之甲兵崇十連之元帥宣威耀武
罷警息兵俾予仰成時乃丕烈可兼鳳翔尹充鳳翔隴
右節度營田觀察處置等使仍充鳳翔隴右涇原節度
管內諸軍及四鎮北庭行營兵馬副元帥改封西平郡

王功臣本官兼官如故

劉洽檢校司空充諸道兵馬都統制

論道經邦允歸碩望建牙統衆必藉雄才中外具瞻安危注意今以二柄付之元臣開府儀同三司檢校尚書左僕射同中書門下平章事持節宋州諸軍事兼宋州刺史充宣武軍節度營田宋毫潁等州觀察處置等使仍權知汴滑宋毫等州都統兵馬事懷德郡王劉洽秉志端亮飭躬簡儉博厚足以容衆和易足以長人純孝

榮親盡忠事國分我閫寄殿于大藩扼制淮夷保障楚
甸戎捷繼至軍聲再揚殪羣兇於宛丘驅大憝於梁野
控引漕輓委輸京師予嘉乃勲懋乃貞節用錫丕命俾
揚洪休燮贊三台紀綱羣帥式是大任爾惟欽哉可檢
校司空同中書門下平章事依前宣武軍節度使度支
營田宋亳等州觀察處置等使仍充宋亳潁等州管內
諸軍兵馬都統散官勲封如故

翰苑集卷八

欽定四庫全書薈要卷二萬六百十五

集部

翰苑集卷九

唐 陸贄 撰

制誥 除授

渾瑊京畿金商節度使制

王者之制安不忘危弘其道則文武齊致教其人則農
戰兼務故雖縣內不可去兵況密邇寇虞干紀稔慝都
邑郊甸騷然靡寧聿求信臣特建戎號濟人夷難允屬

勲賢京畿渭北節度使兵部尚書行在左都虞候渾瑊
忠貞博厚溫恭簡肅持重不撓好謀而成居業克敦其
詩書受賜每陳於廊廡能推誠而撫下不伐己以拒人
委任中外咸著聲績夷險一貫隱然殿邦朕越在郊垌
偏於兇醜授之師律式是我昭侍衛增嚴斥候無爽檢身齊
衆同士伍之勞苦敦陣整旅壯行列之威容靜以伐謀
動而制勝臨危勵節予有賴焉王圻之內沃壤千里縣
亘商嶺屏於南門觀風靖人詰禁誅暴俾爾兼領用孚

于休可京畿渭北渭南金商節度觀察處置等使餘並如故

杜亞淮南節度使制

淮海輿區一方都會兼水陸漕輓之利有澤漁山伐之饒俗具五方地縣千里聿求良牧豈易其才今又革車方興軍賦屢調體於寬大則事缺務於辦集則人殘自非剛柔適中文武兼備其何以副我憂屬惠綏南方正議大夫行尚書刑部侍郎上柱國扶風縣開國男杜亞

識精體要學究宗源妙於用而有常通其變而能久為
理敦教化之本立言參禮法之中道無溜磷行有枝葉
回翔省闈表彌綸獻納之勤踐歷方州著清淨循良之
稱其嚴重可以鎮俗其才術可以匡時休有令問輝映
朝列朕以東南思乂注意求賢爰輟名臣俾寧藩服往
率厥職時惟欽哉可揚州大都督府長史兼御史大夫
充淮南節度觀察處置等使

虔王申光隨蔡等州節度使制

自昔哲王疆理天下必選其明德樹之宗親參制藩維
夾輔王室賢戚並建時惟休哉長淮之西厥壤千里人
靡寧息于茲有年朕其永懷慘若焚灼思得良帥代予
安人釋其危疑彰我信惠以親而授其在于茲開府儀
同三司虔王諒性本溫恭生知忠孝祇服訓導躬行不
渝言皆副誠事必求當端慎可以鎮俗寬厚可以長人
底綏一方庶允憂屬可申光隨蔡等州節度副大使管
內觀察處置等使餘如故

唐朝臣振武節度論惟明鄜坊觀察使制

分命使臣統臨方岳弛張之道蓋亦從宜近甸無虞則
但廉風俗邊陲式遏則兼假旌旄名制雖殊委任俱重
膺是選命莫非勲賢開府儀同三司檢校兵部尚書兼
鄜州刺史鄜坊丹延等州節度觀察處置等使平樂郡
王唐朝臣嘗總偏師邁于多難仗義率衆臨危不迴保
全闕衝抗絕兇逆守而能固出則有功每急病而攘夷
嘗以寡而敵衆竟殲大憝克集茂勲炳然貞心堅若金

石洎師旋歸按俗頒條軍旅慰安流庸悅附奉天定難
功臣開府儀同三司檢校工部尚書兼左金吾衛大將
軍充右街使上柱國建康郡王論惟明釋位勤王有赴
難之節扞城禦寇有持危之功奉主忘身棄家從國越
自郊甸再踰巴梁險阻艱難靡不陪扈忠義所在生死
以之久司禁戎益茂勲績器質敦實識度寬敏通明吏
職練達武經本之以純良輔之以才術俾居藩翰僉謂
汝諧朕以北控單于國之巨鎮彼方戎帥沉痾是嬰卧

護邊軍已淹寒暑憫其盡瘁難以重煩爰咨信臣更踐厥職朝臣可依前檢校兵部尚書兼單于大都護御史大夫充振武綏銀鄜勝等州節度營田處置押兵蕃落等使惟明可依前檢校工部尚書兼鄜州刺史御史大夫充鄜坊丹延等郡防禦觀察處置等使餘並如故

韓滉加檢校右僕射制

周制以輔翼之臣出作方伯漢官以牧守之最擢拜公卿其在匡時中外同體朕以大勞未乂勤卹於黎元多

難荐興注意於藩岳就加命服式寵能賢則增秩進律
亦古之道也金紫光祿大夫檢校吏部尚書使持節潤
州諸軍使兼潤州刺史御史大夫充鎮江軍浙江東西
節度觀察等使韓滉忠肅剛直清公簡儉持至公以檢
下強禦必繩秉大節以事君險艱無易惠能恤衆明足照
姦歲發勤王之師日增贍國之賦軍無撓敗俗以阜康
殿于大邦理平訟息朝有勸典昭升乃庸胙土以報勤
懋官以旌德底乂江甸永孚于休可檢校尚書右僕射

進封昌黎縣開國公餘如故

嘉王橫海軍節度使制

度土分疆設官蒞事因時設制期在理安必順物宜且
從人欲版圖既溢則疏邑以制州統攝或垂則分部而
建長沿革之道亦何常哉滄海之隅地饒俗阜隱然北
土實曰雄藩鎮撫之宜是資懿戚開府儀同三司嘉王
運氣本元淳重承先訓忠肅孝友寬仁惠和勤於服儒
樂在為善施於事任必有可觀舉不失親至公斯在欽

率厥職永孚於休可橫海軍節度使滄景等州觀察處
置等使勲封如故

馬燧李臯實封制

列爵以旌德胙土以報功國有彝章是用褒勸朕以不
德間逢多虞蒲坂有叛亂之臣淮沂有僭逆之帥萬姓
罹害四方靡寧奉誠軍節度兵馬元帥檢校司徒兼侍
中馬燧聞難之初忠誠奮發躬帥士旅討茲不庭畧地
如歸攻城必克晉絳磁隰靡然向風元兇勢窮竟就梟

戮清我旬服時惟茂勲荆南節度觀察處置等使檢校
戶部尚書嗣曹王臯親率全軍抗於强虜晝夜不息迨
於三年謀成必臧師出皆捷復斬黃之地拔安陸之城
隱其威名保乂江漢並著節于國存功于人跡効炳然
僉議攸屬雖懋官已序而食賦未加疇庸之科無乃有
闕宜其寵錫以荅殊休燧可賜實封五百戶通前七百
戶臯可賜實封三百戶

韓滉度支鹽鐵轉運使制

食貨所資邦家大本總領之重必推元臣故周以冢宰
制國用漢以丞相調軍食官給人足謂之善經今戶口
凋傷財產衰耗邊疆未靜役費尚多思欲均厚薄之征
權重輕之制國無匱乏人不怨咨運籌佐時其在良輔
金紫光祿大夫檢校尚書左僕射同中書門下平章事
充鎮海軍浙江東西節度兼江淮轉運等使晉國公韓
滉昔事先朝常掌邦賦貞心獨立一志在公吏無姦欺
財以饒羨自臨江甸事舉風行職貢有加轉餉相繼成

功允集艱食用康介于方隅未極材術宜其弘濟式副
具瞻可充度支及諸道鹽鐵轉運等使餘如故

李叔明右僕射制

行止兩全必惟明哲致其用以匡國敦乎道以保身周
旋令名始終不替斯賢者之極致而行之實難金紫光
祿大夫守太子少傅檢校尚書右僕射持節梓州諸軍
事兼梓州刺史御史大夫充劔南東川節度副大使知
節度事管内度支觀察處置等使蘇國公李叔明稟粹

挺生鬱為邦傑虛懷朗暢達識周通早以器能累更任
遇中外所踐必聞休聲嘗尹京師姦豪屏息洎臨方岳
風俗澄清吏服嚴明人懷德惠憂公奉職勵節存誠服
勞王家行及三紀以茲盡瘁沉恙所嬰扶疾趨朝披誠
告老固陳衰瘵深戒滿盈情皆發衷語且形泣視其激
切良所軫懷敦勸既頻辭乞彌固繼獻章疏期於必從
省之憮然用增感歎雖惜其舊德往蒞遐藩而憫以高
年難違懇志猶資碩望俾長庶寮罷方鎮之煩總中臺

之重式彰尚德且示優賢可依前守太子少傅兼尚書
右僕射

李澄贈司空制

既明且哲以保其身求之昔賢鮮克全備良以謀始匪
易慎終尤難其有志奉公家力輔王室見危而立節將
沒而陳誠操尚堅明謀猷深遠憂國無忘於顛沛周身
不離於令名有臣如斯可以旌勸故義成軍節度滑鄭
等州觀察處置等使開府儀同三司檢校尚書右僕射兼

滑州刺史御史大夫上柱國武威郡王李澄天授將材
勇而多智臨危不懼見義必為崎嶇險艱勲節兼著勤
於廣業曾未遑安帶甲臨戎連年野處積勞成瘁霜露
所侵瘡疾攻中癰疽發外迨茲病亟不替忠誠憂國疚
懷戀闕流涕懼軍戎之乏帥念方鎮以為虞上表披陳
懇求代免辭情激切備慮精深視之感傷當宁興歎雖
史魚之陳尸納諫吳漢之在疚獻謀比方於此不足多
尚天胡不容奪我良帥惻然嗟悼用切深哀始終存義

澄實有之褒美飾終是宜加等可贈司空賜物五百段
米粟三百石以左散騎常侍歸崇敬充使弔祭所緣喪
葬並準式官供仍以澄讓表宣付史館以彰忠節

除鄧州歸順官制

迫以兇威陷于寇境義不受污忠能奮誠履重險而不
回處疾風而逾勁忘軀徇義獻款投誠足以勵彼勤王
激其汚俗去逆効順固先典之攸嘉懋賞勸功驗彝章
而不昧咸從序用俾服官常可依前件

云云

李納檢校司空制

鄭武公父子繼為周司徒內居股肱外作藩翰詩美緇衣之德傳稱夾輔之勲我懷斯人今得良弼開府儀同三司檢校尚書右僕射同中書門下平章事充平盧淄青節度管內度支營田觀察處置陸運海運押新羅渤海兩蕃等使隴西郡王李納字量宏博質性沉毅體仁能斷見善必遷蘊非常之才守以純一秉難奪之節著于艱危昭升令問茂建勲績屬淮夷構亂東夏震騷奮

旅徂征坐籌制勝解商丘之難攘彼兇殘釋陳城之危
俘厥渠帥德功克懋官賞宜崇庸建上台宜賜真食惟
乃先服勤勞王家以殿邦之勲參論道之職俾爾嗣續
光于前人荷國之寵章承家之不構敬慎厥德永孚于
休可檢校司空同中書門下平章事仍賜實封五百戶
餘並如故

翰苑集卷九

欽定四庫全書薈要卷二萬六百十六

集部

翰苑集卷十

唐 陸贄 撰

制誥

鐵券慰問勅書

賜李納王武俊等鐵券文

維興元元年歲次甲子正月癸酉朔二日甲戌皇帝咨
爾某官某嗚呼王者所以撫人失於所撫則叛下者所
以奉上失於所奉則刑各當其理德用不擾各違其分

亂於是生朕德薄化淺昧於君道罔知省己姑務責人
是以徵師徂征連歲靡息惟爾以誠志之不達反仄于
厥衷阻衆興戎結黨拒命豈非上失於所撫而下失於
所奉與書曰萬方有罪罪在朕躬我實不德兆人何咎
俾廢其生業離於室家陷於困窮死於戰陣老疾廢養
孤惻靡依怨結蒼生感傷和氣朕為人父母得不愧於
心哉晨興以思夕惕以悼自嗣位迄今六載天將悔禍
朕方覺悟爾亦知衆心之厭亂思所以保安叶於朕懷

若應符契非天地合德人神合謀將茂育羣生則何以
臻此朕是用上順天意俯從人心滌爾疵瑕復爾爵位
坦然靡阻君臣如初功載鼎彝名藏王府子孫代代為
國勲臣河山帶礪傳祚無絕朕方布大信承天子人若
食其言何以享國嗚呼其祗若命用保無疆之休

賜安西管內黃姓燾官鐵券文

維貞元二年歲次丙寅八月丁巳朔三日己未皇帝若
曰洛爾四鎮節度管內黃姓燾官驃騎大將軍行左金

吾衛大將軍員外置同正員兼試太常卿頓啜護波支
惟爾乃祖乃父代服聲教勤勞王家勲書于鼎彝族列
于藩籍爾克紹先祖之烈而重之以忠貞嗣守職官祇
若朝化率其種落保我邊陲丹誠向化萬里如近是用
稽諸令典錫以券書若金之堅永代無變子孫繼襲作
我藩臣爾其欽承勿替休命

慰問四鎮北庭將吏勅書

四鎮北庭將士官吏僧道耆壽百姓自祿山首亂中夏

不安蕃戎乘釁侵敗封畧道路梗絕往來不通哀我士
庶忽如異域控告無所歸還莫從朕未嘗一夕忘懷而
事勢不及相卹興言軫念忽以涕流卿等咸蘊忠誠誓
死不屈或早從征鎮白首軍中或生在戎行長身塞外
克奉正朔堅保封疆援絕勢孤以寡敵衆晝夜勞苦不
得休息歲時捍禦不解甲冑勲高百戰義叶一心介然
孤城獨守臣節日來月往三十餘年奉國之誠久而彌
勵求諸今古忠烈莫儔義激人倫名光史冊蠢動知感

況於朕懷朕嗣守洪業君臨宇內思安兆庶以絕戰爭

遂與贊普約定好和集蕃漢士庶告天地神祇設壇會

盟永息邊患疆場罷警于今六年近以賊臣朱泚背恩

驚犯宮闕贊普又遣師旅助討姦兇兩國交懽事同一

體北庭去此遙遠信使難通于西蕃既非便宜在國家

又絕來往永念士庶隔在殊方歸路無因親戚永訣為

人父母實所感傷已共西蕃定議兼立誓約應在彼將

士官吏僧道耆壽百姓等並放歸漢界仍累路置頓供

擬發遣待卿等進發然後以土地隸屬西蕃今故遣太
常少卿兼御史大夫沈房及中使韓朝彩等往彼宣諭
仍便與西蕃交割卿等宜遞相慰勉叶力同心互相提
攜速圖進路復歸鄉井重見宗親生人之情莫重於此
一勞永逸固不合辭卿等誠節昭宣勲闕茂著到此之
後當特甄升仍給田園以贍生業必令優厚用荅忠勞
如有資產已成不願歸此亦任便住各遂所安宜勉良
圖副我勤想夏熱卿等各平安好遣書指不多及

與回紇可汗書

皇帝敬問可汗弟兩國和好積有歲年申之以昏姻約之以兄弟誠信至重情義至深頃因賊臣背恩構成嫌釁天不長惡尋已誅夷使我兄弟恩好如舊周皓及踏本啜黑達干等至得弟來書省覽久之良以為慰弟天資雄傑智識通明親仁善鄰敦信明義罷戰爭之患弘禮讓之風保合太和用寧區宇惟茲盛美何以加焉朕之素懷與弟叶契為君之道本務愛人同日月之照臨

體天地之覆育其於廣被彼此何殊況累代以來繼敦
姻戚與弟俱承先業所宜遵奉令圖自茲以還情契彌
固垂之百代永遠無窮緬想至誠當同此意所附踏本
啜奏請降公主姻不失舊頗叶通規待弟表到即依所
請宣示百寮擇日發遣緣諸軍兵馬收京破賊頻立功
勲賞給數多府藏虛竭其馬價物且付十二萬匹至來
年三月更發遣一般餘並續續支付弟宜悉也安西北
庭使人入奏並却歸本道至彼宜差人送過令其速達

弟所寄馬並到深愧厚意

賜吐蕃將書

勅尚覽鑠論莫陵悉繼等至省所陳奏朕具悉之國家
與大蕃親則舅甥義則鄰援息人繼好固是常規朕嗣
位君臨思安兆庶常以信讓為事不以爭競為心區域
雖殊覆育寧別贊普天資仁德好生惡殺與朕同心重
修舊好會蕃漢將相告天地神祇約誓之言至嚴至重
大信一立義無改移所請奉天盟書勅于清水碑石審

詳事理頗甚乖違往歲賊臣稱兵竊據城闕尚結贊志
惟嫉惡義在救災頻獻表章請收京邑朕以宗廟社稷
悉在上都但平寇戎豈惜訓賞遂許四鎮之地以荅收
京之功旋屬炎蒸又多疾疫大蕃兵馬便自抽歸既未
至京有乖始望奉天盟約豈合更論朕欲苟徇彼情便
令鐫刻則是非務實信不由衷欺天罔神莫大於此凡
曰通好貴於推誠將垂百代之名豈顧一時之利但以
事之去就須定是非若不辨明便成姑息親鄰之義豈

所宜然故遣使臣與卿詳議卿是大蕃輔佐必當智識通

明事理昭然不足疑惑儻有他見宜具奏聞審細研窮

須歸至當所論先許每年與贊普綵絹一萬匹段者本

來立約亦為收京然於舅甥之情此乃甚為小事二國

和好即同一家此有所須彼當不恡彼有所要此固合

供以有均無蓋是常理贊普若須繒帛朕即隨要支分

多少之間豈拘定限假使踰於萬匹亦當稱彼所求朕

之所重者信誠所輕者財利思與率土同臻太和想卿

深體至公務存大義安人保境垂美無窮勉思令圖以
副朕意今遣倉部郎中兼侍御史趙聿與來使同往書
中意有不盡並令趙聿口宣尚結贊論莽羅等嘗總師
徒往來赴難功雖未就義則可嘉其所領將士等朕先
許以賜物一萬匹段並已排比許卿所商量指定此使
却回即發遣往今各賜卿少物至宜領之

賜吐蕃宰相尚結贊書

勅尚結贊卿天資材術作輔大蕃識通古今志奉忠信

義聲著積遠近流傳比聞入典樞衡近知還總戎務二
國所定和好首末是卿商量得卿却來深以為慰昨者
邊軍狀奏彼國兵馬踰越封疆朕以畫界立盟先有定
分贊普素敦仁義卿又特稟純誠背約侵漁必無此理
但勅邊城自備不令輒動干戈若使効尤恐成交惡初
疑界首遊奕少有乖宜不謂大發師徒漸加侵軼興兵
動衆必合有名蕃軍此行未測其故朕自嗣膺寶位即
與贊普通和敦以舅甥結為鄰援懲戰爭之弊知禮讓

之風彼此大同務安衆庶乃於境上建立壇場契約至
明誓詞至重告于皇天后土諸佛百神有渝此盟殃及
其國朕敬奉誠約分毫不移信使交懽歲時無絕碑文
具在可以明徵豈有一事不行一言不守頃令趙聿專
往近方從彼却回兼聞彼蕃使同來至今獨在道路卿
所論奏朕並未知待詳事由乃可商議既稱和好理絕
相疑未合輕舉甲兵便踰境界盟誓之語忽焉如遺天
地神明豈其可罔卿智識明達朕所深知頃年猶舉義

師救此災患今豈不存大信遂棄令名故專遣使見卿
欲得審知來意竚聞還奏以副所懷趙聿及蕃使合到
待覽表中意旨續即商量報卿卿涉遠而來當甚勞頓
今賜卿某物至宜領之秋冷卿比平安好將士並存問
之

賜尚結贊第二書

趙聿及論拱熱等至得卿表奏具見懇誠省覽言辭即
稱和好及覩事跡唯務侵凌矛盾若斯將何取信審察

書中之意蓋求四鎮北庭如此事宜足得商議既言通
好理絕相疑未合輕舉甲兵便踰境界盟誓之語忽焉
如遺天地神祇豈其可罔又聞放縱兵馬蹂踐禾苗邊
境之人大遭驅掠在此未為深損於彼殊非遠謀卿之
用心何乃至是國家利害計須久長和好之道既虧仁
義之風何在卿智識明悟朕所深知頃年猶發義師救
此災患今豈不存大信遂棄令名故遣使見卿欲得審
知來意必若守其盟誓務在同和即收斂兵車速歸本

界所掠百姓一切放回然後可表卿直心信卿來奏續
即遣使與論拱熱同往諸事並有商量交歡必令得所
或密懷他意將欲別謀彼雖未說實情此亦畧為準擬
但緣誓約本重朕意不欲先違以此勤勤合有相問佇
聞來奏以副朕懷

賜尚結贊第三書

勅尚結贊蕃使論拱熱等與趙聿同到卿所陳奏朕具
悉之誠意勤勤志敦和好上以成舅甥之義次以結鄰

援之歡外以彰禮讓之風內以息戰爭之患兼此數事
昔賢所難非卿材越等倫識通今古豈能匡輔大國弘
宣遠圖施美利於當時傳盛名於不朽眷懷明畧歎尚
良多然以贊普來書務於叶睦卿之所奏亦貴通和初
覽其言實嘉德義及觀其事頗訝乖違以卿賢明朕所
信重棄義踰約計必不然未測事由因何至此頃年所
定和好言約頗謂分明至如四鎮北庭元不割與蕃國
及朱泚悖逆作亂上都卿仗義興師請收京邑遂許四

鎮北庭之地將以報荅成功旋屬炎蒸蕃軍便退奉天之約豈可更論事甚分明固無疑惑凡言結好所貴和同通體商量有何不可大蕃必若要四鎮北庭之地即合直以情言彼但露其誠心此亦自有分義豈假曲徵前事廣起異端仍發師徒務張威勢蕃使猶未至此蕃軍早已越疆或稱欲自赴朝或云更定言誓既虧盟約且失禮儀言與事乖將何取信夫人君立國必不徒然惟漢與蕃各受天命勝負固有定分強弱寧由力爭卿

欲以衆相侵以威相脅謂天地可罔謂盟誓可渝即當肆意所為不必更論和好儻欲守其前約敦以親鄰去就之間固宜有禮遣使來往足得商量張皇師徒是何道理和好者禮義之事甲兵者爭奪之由二端懸殊理不並用今欲以用兵之勢定和好之辭事必不成縱成何益卿識見通敏器宇沉詳如此事宜不言可悉未知來意竟擬如何且首末同和是卿商議清水會盟之日卿又親發誓辭將期去殺好生修文偃武永安兆庶垂法

子孫天下稱嗟以為盛美未經數歲遽有變移非獨見

謂於四方亦將取笑于千古以此思度甚欲通和彼雖

小以侵陵朕亦未即交惡故遣某官與卿更審籌量卿

若必務同和更無他意即宜便歸本界遣使具述本情

所須四鎮北庭朕當自有推議如或託稱繼好志在別

圖依前縱兵不即歸國惟利是視亦識彼懷和與不和

於茲決定書中事有不盡並令某官某口宣宜令速回

佇望來奏所獻方物深表遠誠今賜卿某物至可領也

秋冷比平安好



翰苑集卷十